



Ақмешіт

12 шілде
сейсенбі
№55 (1860)
2022 жыл

Газет
1994 жылдың 15 сәуірінен
бастап шығады

• Қалалық қоғамдық-саяси әлеуметтік-
ақпараттық тарихи-танымдық газет •
E-mail: akmeshit.kz@mail.ru

апталығы

КАСПИЙ ҚҰБЫР КОНСОРЦИУМЫ: ТЫҒЫРЫҚТАН ШЫҒАР ЖОЛ ҚАЙСЫ?

Неше күннен бері Ресей тарапы Қазақстанның құбырлы мұнай жолын жауып тастағаны айтылып, мамандар экономикаға едәуір шығын келеді деп дабыл қағуда. Біздің құбырлы мұнай жолы деп отырғанымыз – Каспий құбыр консорциумы. Өйткені Қазақстан мұнайының негізгі экспорттық бағыты да осы. Себебі экспортталатын ел мұнайының басым білігі осы бағыт арқылы шығарылады.

КАСПИЙ ҚҰБЫР КОНСОРЦИУМЫ ДЕГЕН НЕ?

Мәселенің мәнісіне үнілмес бұрын Каспий құбыр консорциумы деген не, соған түсінік берейік. 1998 жылы шыққан ұлттық энциклопедияда бұл консорциумды Қазақстанның Теңіз және басқа мұнай кеніштерінен Қара теңіз жағалауындағы Новороссийск қаласына дейін шикі мұнай тасымалдау үшін мұнай құбырын салу мақсатымен 1992 жылы Ресей, Қазақстан және Оман мемлекеттерінің компаниялары құрғаны айтылған. 1996 жылы желтоқсанда консорциумның құрылымын өзгерту туралы келісімге қол қойылды. Ол бойынша консорциум капиталының 50%-ы дүние жүзінің мұнай өндіруші алашқы он ірі компаниясының құрамына кіретін халықаралық компаниялардың қолына көшті. Қалған 50% Қазақстан, Ресей, Оман мемлекеттеріне тиесілі.

Республикалық «Егемен Қазақстан» газетіне біз көтерген мәселе хақында жазылған мақалада желінің қуаттылығы жылына 67 млн тонна мұнайды құрайтыны жазылған. «Қазақпарат» ақпарат агенттігінің мәліметіне



сүйенсек, 2018 жылы КҚК-ның Новороссийск портындағы теңіз терминалынан жөнелтілген барлық мұнайдың 54,3 млн тоннасы қазақстандық кен орындарда өндірілгені айтылған. Сол уақытта мұнайдың ең үлкен көлемі Теңізден - 28,7 млн тонна, Қашағаннан - 13,2 млн тонна және Қарашығанақтан 10,3 млн тонна түсті. КҚК арқылы Қазақстанның барлық экспорттық мұнайының

үштен екі бөлігі тасымалданады. Бір сөзбен айтқанда, Каспий құбыр консорциумы Ресей аумағы арқылы қазақстандық мұнайды экспорттау және құбыр құрылысы үшін құрылған. КҚК қашықтығы 1511 шақырымды құрайтын «Теңіз-Новороссийск» мұнай құбырына ие. Ол Қазақстанның батысындағы кен орындарды Ресейдегі Қара теңіз жағалауымен байланыстырады. **2 БЕТТЕ**

Бұл – қоғам көкейіндегі сауал. Әсіресе әйелдер қауымы зейнет жасын төмендетсе деген тілегін айтып келеді. Әсіресе елдің үшін жоғарыға жеткізетін депутаттармен кездесу сайын зейнет жасы қозғалмай қалған емес. Өз кезегінде халық қалаулылары елдің ұсынысын депутаттық сауалға арқау етті. Кеше Үкімет басшысы Әлихан Смайыловтың депутаттардың зейнет жасына қатысты сауалдарына жауабын «Egemen.kz» сайты жариялады.



ЗЕЙНЕТ ЖАСЫ ТӨМЕНДЕЙ МЕ?

Премьер-министрдің пікірінше, зейнетақы жасын біріздендіру – қаражат үнемдеу емес, лайықты зейнет-ақымен қамтамасыз ету.

«2018 жылдан бастап әйел адамдардың зейнеткерлік жасы жыл сайын 6 айға артып келеді. Осы үдеріс кезең-кезеңімен 10 жылда іске асырылады. Зейнетақы жасын біріздендіру бюджет қаражатын үнемдеу үшін емес, лайықты зейнетақы мөлшерін қамтамасыз ету үшін енгізілген. Өзіңізге белгілі, қазақстандықтар бюджеттен базалық және ынтымақты зейнетақысын алады. Ынтымақты зейнетақы азаматтардың 1998 жылға дейінгі 2 еңбек өтілі мен соңғы 3 жылдық табысы негізінде есептеледі. Нәтижесінде жыл сайын бұл төлемнің түрі кеміп, жинақтаушы зейнетақы үлесі өсетін болады. Сондықтан зейнетақы жасын төмендету зейнетақы салымдарының көлемінің кемуіне және осы жүйеден берілетін төлемдердің де күрт қысқаруына алып келеді», – деді Премьер-Министр.

Оның айтуынша, өмір сүру ұзақтығының өсуіне байланысты зейнеткерлік жасын көтеру үрдісі дамыған мемлекеттерде де, көршілес Әзербайжан, Армения, Ресей, Беларусь елдерінде де қолға алынууда.

«Осы өзгерістерді есепке ала отырып, елімізде зейнетақы жүйесінің тиімділігін арттырудың жаңа шаралары пысықталып жатыр. Олардың аясында: 1) зейнетақының мөлшерін арттыруды көздейтін зейнетақымен қамсыздандыру жүйесіне параметрлік өзгерістер енгізу; 2) инфляция деңгейінен 2%-ға аса отырып, ынтымақты зейнетақы мөлшерін индекстеуді сақтау; 3) жұмыспен қамту мәртебесіне байланысты зейнеткерлік жасқа жақындап қалған әйелдер үшін жаңа қолдау шараларын анықтау. Әлеуметтік жобаларға тарта отырып, жұмыс істемейтін әйелдердің зейнетақы жүйесіне қатысу мерзімін ұзарту; 4) зейнетақымен қамсыздандыру жүйесінің демографиялық трендтерге және бюджет кірістеріне тәуелділігін төмендетуге арналған жинақтаудың шартты компонентін енгізу көзделген. Осы шаралар зейнеткерлердің барлық санаттары үшін зейнетақы төлемдерінің барабар мөлшерін қамтамасыз етеді», – деп жауап берді премьер-министр Әлихан Смайылов.

ЖОЛДАУ ЖҮКТЕГЕН ТАПСЫРМА ҚАЛАЙ ОРЫНДАЛУДА?

Мемлекет басшысы Қасым-Жомарт Тоқаевтың «Жаңа Қазақстан: жанару мен жаңғыру жолы» атты Қазақстан халқына Жолдауының жарияланғанына біршама уақыт болды. Жолдауда қамтылған барлық мәселе қоғам үшін өзекті. Соның ішінде мемлекетті оңтайлы басқарудың жаңа үлгісіне өту, азаматтардың мүддесін лайықты қорғау және олардың мемлекет басқару ісіне қатысуын кеңейту бағыттарына баса назар аударылып, жүйелі жұмыстардың қолға алынуы қарапайым халықтың атқарушы билікке деген сенімін арттыра түскені жасырын емес.

Президент азаматтардың мемлекетті басқару ісіне қатысуын кеңейту мәселелерін басым бағыттар қатарына жатқызып, тиісті тапсырмалар берді. Олар жүйелі түрде орындалып, азаматтардың мемлекетті басқару ісіне тарту ісі серпін алды. Соның бірі – ауыл әкімдерін халықтың өзі сайлау үрдісі. Бұл бастама Сыр өңірінде де жүйелі жүргізіліп келеді.



ПРЕЗИДЕНТ ПӘРМЕНИ

«Қазақстан дамудың келесі кезеңіне қадам басты. Әлеуметтік-экономикалық және демографиялық ахуал мүлде басқа. Бүгінгі сын-қатерлер де, міндеттер де бөлек. Мемлекетіміздің өркендеуі аймақтардың қуатты болуына тікелей байланысты. Мен бұл мәселеге 2019 жылғы Жолдауымда кеңірек тоқталдым. «Қуатты өңірлер – қуатты ел» деген ұстаным әрдайым өзекті. Осы орайда, еліміздегі әкімшілік-аумақтық құрылымның оңтайлы болуы өте маңызды. Бұл қай жағынан аласақ та дұрыс қадам болды. Оны халық өте жылы қабылдады. Мен «Тәуелсіздік барінен қымбат» атты мақаламда осы үрдіс жалғасатынын айтқан едім. Өңірлерді қаржыландыру жүйесін түбегейлі қайта қараған жөн. Қазіргі кезде ауылдық округтер жоғары тұрған әкімдерге толығымен тәуелді. Сондықтан мардымсыз қолдауға ие болуда. Әкімдер сайланатынын ескеріп, халықаралық тәжірибеге сәйкес, жергілікті өзін-өзі басқару органдарын тікелей қаржыландыру тәсілін енгізген дұрыс болар еді. Сондай-ақ олардың меншік базасын едәуір кеңейту қажет», – деді Президент. **2 БЕТТЕ**

ХАЛЫҚ ҮНІ

ЕЛДЕН СҰРАҚ, ӘКІМНЕН ЖАУАП



«Елден сұрақ, әкімнен жауап» айдары арқылы бұған дейін қалаға қарасты кеңіттер мен ауыл әкімдері тұрғындар тарапынан қойылған сұрақтарға жауап берді. Бүгінгі кезекте Талсуат ауылдық округі тұрғындарының сауалына ауыл әкімі Аібек Жылқыбай жауап берді. **2 БЕТТЕ**

ТОЛҒАНДЫРҒАН ТАҚЫРЫП

Қыс бойы суықтан шаршаған жұрттың жазды асыға күтетіні рас. Қытымыр аяздан шуақты күнге жеткенше күн санап кететініміз бар. Әрине, бар қызық осы мезгілмен келеді емес пе? Суға түсу маусымы да осы шақта басталады. Бұл әсіресе балалар үшін нағыз қуанышты сәт. Иә, Сырдың аптап ыстығында суға түспеу сірә, мүмкін емес. Сондықтан суға шомылудың сәтін үлкен-кішіміз де қалт жібермейміз. Өзен жағасында тұратын тұрғындар үшін бұл тіпті оңынан шешіліп-ақ тұр. Арнайы суға түсу орнына бармай-ақ өзенге түсіп сергіп алуға болады. Көп адам осылай ойлайды. Солай жақын маңнан өзен жағасына, каналға суға түсіп жатады. Сәтін салып сергіп аласаң жақсы ғой, соңы қайғыға ұласып жатса қиын. Өкінішке орай, бәрі біз ойлағандай қызықты, қуанышты бола бермейді. Қанша асығып күтсек те осы бір маусымның кейде көңілді сәтпен емес, қайғылы жағдаймен есте қалатыны жасырын емес.

ЖАЗ МАУСЫМЫ СУҒА КЕТУМЕН ЕСТЕ ҚАЛМАСЫН

ҚАЛАЛЫҚТАР ЖАЗДА ҚАЙДА ДЕМАЛАДЫ?



Қала тұрғындары жаз маусымында ПМК-29, «Сабалақ», «Эдельвейс», саяжайында орналасқан демалыс орындарына барады. Одан бөлек «Бөйгеқұм», «Қамбаш» көліне жол тартатындары бар. Тұрғындар аталған саяжай аумағына жаз бойы кемі 2 реттен баруы мүмкін. Ал соңғы екі көлге барып жазғы демалыстың нүктесін қояды. **2 БЕТТЕ**

Осы ретте көпшілік демалатын орынның талапқа сай келмейтіні де атап өткен жөн сияқты. Шағын бассейні бар бір аумақта 10-15 шақты орын бар. Әр орынға бір топ адамның орналасатынын ескерсек, аядай жерде қанша адамның шомылатынын ойша есептей беріңіз. Мұндайда санитарлық-гигиеналық талаптың сақтала қоюы екіталай. Одан бөлек қызмет көрсету сапасы да ойдағыдай бола бермейді. Біздегі ақсап тұрған дүниенің бірі – осы. Сондықтан жаз маусымындағы демалыс орынның жетілдіруі қажет-ақ. **2 БЕТТЕ**

АЖЫРАСУ МӘСЕЛЕНІҢ ШЕШІМІ МЕ?



Ажырасу... Бір ғана сөз көптеген ұйыған отбасының тағдырын бір сәтте басқа арнаға бұрып жібереді. Өкініштісі, шайқалған шаңырақтың зардабын бүлдіршіндердің тартатыны. Қазіргі таңда «кеше үйленіп еді ғой, бір жылға толмай ажырасып кетіпті», «пәленшең қызы ажырасып, қайтып келіп отыр» немесе «Түгеншең келіні кетіп қалыпты» деген сөздерді жиі естиміз. Қоғамды дендеген бұл дерт елімізде соңғы жылдары тым көбейіп барады. **3 БЕТТЕ**

